



## 閩南語現代詩 社會組第二名

### 水滸心情—看運河夜景

又 koh 吞落一粒日頭想 beh 安眠  
予烏夜 ê 輕紗遮罩佇身軀四箍圍  
拒絕彼無聊 ê 喙瀾 kap 輕視 ê 眼神  
蠓蟲一樣  
存心 ê 攪吵惡意 ê 中傷  
按呢久年來  
起落 ê 心情才會當得著短暫 ê 平靜  
齷齪 ê 靈魂才有法度等待淡薄 ê 坐清  
沉底散離 ê 往事嘛才有機會重新現身浮面

想當初時  
猶是大海血脈相連 ê 兄弟  
江湖隨在你放蕩走跳  
何等 ê 威風氣魄  
無人敢阻擋你 ê 來去攔閘你 ê 出入  
小可伸動跤手  
就敲響出各路起義 ê 鑼鼓  
kā 數百冬來恬靜 ê 天地拍 phún kah 茫煙散霧  
到底啥人是英雄好漢啥物是土匪賊寇  
到今猶是無停咧爭論袂當落筆收尾 ê 故事  
大力一聲喊喝  
就絞滾起陣陣造反 ê 風湧  
冲破禮教道德無數重兵防守 ê 堤岸

kā 千萬里外龐大 ê 江山震動甲塗崩石落  
不時猶佇歷史深更 ê 惡夢裡驚醒

何苦貪戀一時 ê 虛華  
接受伊官府 ê 招安  
七十萬兩銀粗俗就出賣家己 ê 自由  
三千米長百外尺闊 ê 土地簡單就反背眾人 ê 信任  
所謂安定 ê 生活根本就是慢性 ê 自殺  
當你放棄反抗 ê 力量同時也失去存在 ê 價值  
曾經是一尾捋風弄湧 ê 活龍  
煞變成這款強 beh 無脈斷氣 ê 死蛇  
規身軀病疼  
欲按怎洄會出去這個命運 ê 陷阱  
吞食傷濟是非 ê 塗砂  
你原本曠闊 ê 腹腸慢慢仔變淺變狹  
淋落過量恩怨 ê 油臊  
原本熱情柔軟 ê 血管嘛已經反冷反硬  
幾滴 ê 污水一點仔糞埽就會當 kā 你抹烏撓臭  
毋管以後朝代按怎變換  
死水 ê 心  
早就激動袂出任何驚人 ê 氣勢  
干焦會當束手吐氣  
忍受伊風刻薄 ê 鬪洗雨尖酸 ê 諷刺

翻身已經無望回頭恐驚嘛揣無退路  
敢講這條無期 ê 徒刑就是你人生最後 ê 結論  
這個烏暗 ê 監牢也是你性命孤單 ê 尾站  
這身 ê 臭名  
愛等到啥物時陣才會當  
洗清

## 作者註

臺南運河所在，原為臺江內海遺址，日治時期大正 11 年（1922 年）闢建，造價 70 萬 3000 日圓，全長 3,782 公尺，面寬 37 公尺。因設計不當、泥沙淤塞，功能盡失；加上人為汙染、環境破壞，形同一條臭水溝。

## 作者感言



陳正雄 台文筆會理事

自古以來「共患難易 同享福難」是一直予人感慨的宿命，不而過「革命尚未成功 同志已經反面」更加予人遺憾的心疼。